


**IN MEMORIAM**  
**HAMDIJI KREŠEVLJAKOVIĆU (1888 — 1959)**



*Iznenada nas je ostavio, u času kada je još s punim poletom dovršavao jedno kapitalno djelo. Bio je dobar drug i dobar čovjek.*

*Kada su prije više od jedne decenije udarani temelji konzervatorske službe u Bosni i Hercegovini, Hamdija je bio među prvima, koji su se prihvatili ovog odgovornog posla. Njegovo životno i radno iskustvo uplelo se tada u prve niti novih zadataka. Izgledalo je kao da se cijelog života spremao za ovaj posao. Veliko poznavanje spomenika naše kulturne prošlosti omogućilo mu je da se brzo snaho u zadacima koje nam je postavljao Zakon o zaštiti spomenika kulture.*

*Neizmjerljivo je velik njegov doprinos stvaranju, uređenju i usavršavanju evidencije i dokumentacije svih vrsta spomenika kulture turskog perioda u Zavodu za zaštitu spomenika Bosne i Hercegovine, a isto tako i njegov udio u pokretanju i uređivanju Naših starina, kao godišnjaka Zavoda. U tim poslovima nam je njegov gubitak nenadoknativ.*

*Pristupačan za svakog čovjeka, stvorio je vremenom široki krug znanaca i prijatelja, koje je zatim predao u baštinu mladoj konzervatorskoj službi Bosne i Hercegovine.*

*Bio je nesebičan, pogotovo prema mladim ljudima kada su sa prvim koracima u samostalnom životu trebali još potpore od iskusnih seniora.*

*U Zavodu za zaštitu spomenika kulture BiH kao i u Redakciji Naših starina pokojnik je uživao ugled voljenog starijeg druga, naučnog radnika i učitelja, pa će uspomena na njega ovdje ostati trajna i uvijek draga.*

*Redakcija Naših starina*